

# **La famiglia el focus**

Brev pastoralala per la Cureisma 2015

da

msgr. dr. Vitus Huonder

Uestg da Cuera

*Quella brev pastorala ei da preleger en tuts survetschs divins  
l'emprema dumengia da Cureisma, ils 22 da fevrer.  
Ella sa vegnir publicada ella pressa naven dils 22 da fevrer  
2015.*

*Cuera, ils 28 da december 2014  
Fiasta dalla sontga Famiglia*

Frars e soras en Cristus,

„Cumplenus ei il temps, ed il reginavel da Diu ei damaneivel: Seconverti e cartei alla buna nova“ (Mc 1,15). Bein quei ei il coc dalla nuviala dil Segner. Siu entir operar cumprova la vischinonza dil reginavel da Diu. Entras quella vischinonza survegn nossa entira veta in niev senn. Da quei ei il singul carstgaun pertuccaus, da quei ei l'entira societad humana pertuccada, da quei ei era pertuccada la famiglia “la zella dil fundament e dalla veta dalla societad humana”<sup>1</sup>. Gest entras la vischinonza dil reginavel da Diu, entras la vischinonza da Cristus, cul qual il reginavel da Diu ei vegnius tier nus, stat era la famiglia en in contuorn, ord il qual ella sa retscheiver forza ed agid.

Naven dils 5 entochen ils 19 d'october 2014 ha giu liug el Vatican la tiarza sinoda episcopala extraordinaria. La tematica era la famiglia. La dieta ei ussa terminada ed ins seprepara gia sin la continuaziun dalla discussiun igl atun che vegn. In εμπrem resultat dalla radunonza generala ei avon maun el *rapport dalla sinoda*<sup>2</sup>.

---

<sup>1</sup> Secund Concil Vatican, decret sur digl apostolat dils laics *Apostolicam actuositatem*, 1965, 11.

<sup>2</sup> *Relatio Synodi*. Tiarza radunonza generala extraordinaria dalla sinoda episcopala “Las sfidas pastorales en veta alla famiglia el context dalla evangelisaziun”, 2014

Per la discussiun dalla sinoda episcopala han ins deliberau ils 24 da zercladur 2014 *in text da lavur*, il schinumnu *Instrumentum laboris*. Sco el rapport dalla sinoda anflein nus era lien bia patratgs stimulonts pertuccond la famiglia. Igl ei plaid che fan a nus curascha e che stimuleschan aunc dapli da s'engaschar pli intensivamein per la valeta dalla famiglia en nies temps. La Baselia duei gie haver ina influenza constructiva sin la societad, aschia ch'ei dat adina meglieras premissas per la veta dils carstgauns e la famiglia. Cheutras vegnan svilups problematici dustai ni corrigi. Il text da lavur sco era il rapport dalla sinoda san dar a nus leutier entgins impuls.

## **La famiglia cristiana el trend**

Il rapport dalla sinoda di: “Cun legria interna e profunda consolaziun mira la Baselia sin las familias che restan fideivlas allas ductrinas digl evangeli”<sup>3</sup>. Quella legria ha in raschun, pertgei ei vegn detg el text da lavur: “El pievel da Diu vegn la famiglia reconuschida sco in bein nunappreziabel, sco in ambient natural per la carschientscha dalla veta, sco scola dalla humanitad, dalla carezia e dalla speranza per la societad.

---

<sup>3</sup> *Relatio Synodi* 23.

Ella resta vinavon il liug preferiu, nua che Cristus paleisa il misteri e la vocaziun dil carstgaun”<sup>4</sup>. Sche jeu legel quella valetaziun, lu vegnan endamen a mi sentupadas en differentas pleivs e tier differentas occurrenz, tier la qualas ins po sentir la dinamica che schai en ina veta da famiglia cristiana, co la cardientscha va naven dil geniturs vi sils giuvenils e sils affons e co la Baselia daventa cheutras viventa.

Beinsavens stattan davos quels svilups positivs era moviments spirituals e gruppaziuns spiritualas cun la finamira da promover e sustener la veta da famiglia. Quei fa vegnir nus cunscients: La Baselia viva, sch’ella vegn purtada dad in ambient che reunescha e sustegn las familias, che promova l’instrucziun religiosa e porscha agid en situaziuns hanadas. “Dals moviments spirituals sortescha en nies temps ina contribuziun speciala per promover ina pastoraziun da famiglia autentica e efficienta”<sup>5</sup>. Quei ei ina constataziun ord il text da lavur, e con fetg che quei constat astgel jeu adina puspei experimentar sin mes viadis pastorals. Per quei less jeu dad ina vart exprimer miu engraziament a tuts quels moviments ed da l’altra vart encuraschar els da continuar cun lur preziosa

---

<sup>4</sup> Las sfidas pastorals en veta alla famiglia el context dalla evangelisaziun. *Instrumentum laboris* 2014, 31.

<sup>5</sup> *Instrumentum laboris* 58.

contribuziun pertuccont igl accumpignar e promover la famiglia.

### **Pretendiu clara annunziaziun dalla ductrina**

En vesta a differentas difficultads di il rapport dalla sinoda: “En quei connex senta la Baselia il basegns da dir in plaid da verdad e da speranza”<sup>6</sup>. Ed il text da lavur constatescha: “Ei para che l’enconuschientscha dils documents conciliars e postconciliars digl uffeci ductrinal sur dalla famiglia ei en general mo scartamein avon maun el pievel da Diu”<sup>7</sup>. Nua che quella enconuschientscha manca, san ins strusch sviluppar ina veta da famiglia positiva e cristiana. Daco quella munconza d’enconuschientscha? Ina risposta dil text da lavur secloma: “Entginas dallas remarclas inoltradas vesan la responsablada per la fleivla derasaziun da quellas enconuschientschas tiels pasturs sez. Tenor l’impressiun d’entgins cartents enconuschien els buca da rudien la tematica da lètg e famiglia sco ella ei presentada els documents, ni ch’els paran buca da ver ils mieds per dilucidar quella tematica”<sup>8</sup>. Quei sto dar da patertgar a nus tuts. La conseguenza orda quei ei: Nus stuein

---

<sup>6</sup> *Relatio Synodi* 11.

<sup>7</sup> *Instrumentum laboris* 11.

<sup>8</sup> *Instrumentum laboris* 12.

sefatschentar pli intensivamein cun la ducrina dalla Baselia sur da lètg e famiglia. Ei astga buc esser a nus tuttina sch'ei ha medemamein num el text da lavur: “En entginas rispostas semuossa era ina certa malcontentientscha pertuccont entgins spirituals che paran indifferentes en vesta ad entginas ducrinas da moralas. Lur munconza da consens cun la ducrina dalla Baselia effectuescha confusiun el pievel da Diu. Ei vegn perquei supplicau ch'ils spirituals duein esser meglier preparai e haver senn da responsablada tier la declaraziun dil plaid da Diu e tiel presentar ils documents dalla Baselia arisguard lètg e famiglia”<sup>9</sup>. Talas supplicas ein ina intimaziun da purtar viaden ella societad la buna nova dalla famiglia. La verdad dalla cardientscha sur dalla famiglia sa sin quella moda daventar in ferment che mida il mund e che contribuescha da realisar ina aulta pretensiun. Il text da lavur constatescha: “Sch'ei gartegia da presentar ina vesta da lètg e famiglia che corrispunda alla cardientscha cristiana, lu vegn ins era cunscients da sia verdad, sia buontad e bellezza”<sup>10</sup>.

---

<sup>9</sup> *Instrumentum laboris* 12.

<sup>10</sup> *Dito* 13.

## **Geniturs han ina rolla irremplazzabla**

Il text da lavur plidenta era la responsablidad dils geniturs quei che pertucca il dar vinavon la ducrina dalla Baselia sur da lètg e famiglia: “Gia ditg avon ch’els s’annunzian per l’enzinnaziun, drovan ils carstgauns giuvens agid per emprender d’enconuscher tgei che la Baselia docescha e pertgei ch’ella docescha quei. Biaras rispostas accentueschan la rolla dils geniturs tier la catechesa speciala sur dalla famiglia. Els han ina rolla nunremplazzabla quei che pertucca l’educaziun cristiana dils affons en relaziun cugl evangeli dalla famiglia”<sup>11</sup>. “L’educaziun consista ord ina introducziun vasta e profunda ell’entira realitad ed oravontut ella veta sociala. La responsablidad primara han cheu ils geniturs”<sup>12</sup>.

## **In resvegl positiv**

La ducrina da nossa cardientscha sur da famiglia e lètg ei ina ducrina fascinonta, ina ducrina che sa emplenir il carstgaun e far el ventireivels. Perquei ei sia derasaziun ed acceptanza in’incarica urgenta da nus tuts<sup>13</sup>. Neu da quella ducrina

---

<sup>11</sup> *Instrumentum laboris* 19.

<sup>12</sup> *Dito* 132.

<sup>13</sup> Paul VI. Enciclica *Humanae vitae*, 1968. Gion Paul II. Scriver apostolic *Familiaris consortio*, 1981. Catechissem dalla Baselia catolica: Editio typica Latina 1997, Translaziun tudestga 2003, nr. 1601-1666; 2201-2233.



fascinonta che empleina ils carstgauns, san lu era problems vegnir ventilai che san mo anflar la dretga risposta entras ina profunda cardientscha, ina buna enconuschientscha dalla ductrina ed ina ferma enragischaziun en Diu.

La damonda setschenta: Co savein nus dar vinavon la vesta cristiana dalla famiglia e sia gronda valor? En emprema lingia stat la preparaziun per la lètg. Ella cumpeglia ozildi savens bia dapli che mo la preparaziun directa per retscheiver il sacrament dalla lètg. Aschia di il text da lavur: “Ei vegn sutligniau ch’ils cuntegns dils cuors han fatg atras ils davos onns ina midada decisiva: Dad in program che ha mo il sacrament en mira ein ins ius vi sin l’annunziaziun primara dalla cardientscha”<sup>14</sup>. La preparaziun per la lètg daventa aschia ina schanza per ina annunziaziun extendida dalla cardientscha. Quella schanza stuess aunc vegnir nezegiada pli fetg. Quei ei il meini da biaras reacziuns sin il questiunari da Papa Francestg e dalla sinoda sur dalla situaziun hodierna dalla famiglia. Impuls ord cuminonzas e moviments vegnan preziai positivamein el text da lavur: “Dils moviments spirituals sortescha en nies temps ina contribuziun speciala per promover ina pastoraziun da famiglia autentica ed efficiente. ... Entginas contribuziuns han accentuau, co ei gartegi en biars uestgius da promover programs specials, ina

---

<sup>14</sup>

*Instrumentum laboris 53; cump. leutier Relatio Synodi 36.*

perfecziun per pèrs ch'èin habels da sustener auters pèrs ed ina retscha d'iniziativas per promover ina pastoraziun da famiglia autentica”<sup>15</sup>. Per nus èin talas declaronzas buca mo animontas, ellas provocheschan nus e stimuleschan ad in examen da cunscienza en quei senn, schebein da tals svilups èin era vegni instradai tier nus. Prendein nus serius tals programs? Savessen nus aunc far dapli?

### **La muntada dalla perdetga da cardientscha**

Mintga verdad da cardientscha cristiana drova perdetgas, quei vul dir carstgauns che vivan ella e che s'engaschan per ella. Era la lètga e la famiglia tenor il plan divin èin visadas sin perdetgas, sin babs e mummas, sin giuvenils ed affons che vivan tenor quei plan, era sin persunas dalla veta publica che stattan en per quei. Leutier di il text da lavur: “Denter las lingias pastorals ch'èin proponidas, sesanflan las suandontas: Porscher da giuven ensi ina via, sin la quala ei gartegia d'emprender d'appreziar la bellezza dalla lètga; formar ils collaboraturs pastorals arisguard la lètga e la famiglia. Numnada vegn era la perdetga da gruppas da giuvenils che sepreparan entras in temps da spusalezi en abstinenz sin la lètga”<sup>16</sup>. Accentuau vegn era ch'ei dat in connex

---

<sup>15</sup> *Instrumentum laboris* 58.

<sup>16</sup> *Instrumentum laboris* 82; cump. era *Relatio Synodi* 39.

denter l'aviartadad per affons, las damondas socialas e las damondas dalla fiera da lavur: “Perquei dat ei era ina responsablada civila dils cristians da vuler leschas e structuradas che promovon ina tenuta positiva enviers la veta naschenta”<sup>17</sup>.

“Jesus enquera annunziaders digl evangeli che annunzian la buna nova buca mo cun plaids, mobein oravontut entras ina veta ch’ei vegnida midada ella preschientscha divina”<sup>18</sup>. Cun quels plaids ord *Evangelii gaudium* renda Papa Francestg nus attents da internalisar persunalmein la nuviala dil Segner. Tgi che ha schau midar la veta ella preschientscha da Diu, ei habels d’annunziar era ozildi igl evangeli ed era la buna nova dalla famiglia. Jeu giavischel che las numerusas declaronzas positivas entuorn la sinoda dils uestgs animeschien nossas pleivs e las cuminonzas religiusas da far pli profundamein patratgs sur dalla tematica impurtonta dalla famiglia cristiana e da dar vinavon ils numerus impuls. Bugen prendein nus era l’oraziun tier la sontga Famiglia che Papa Francestg ha mess a cor a nus e che finescha cun il clom: “Jesus, Maria e s. Giusep, tedlei nossa supplica ed exaudi ella.” Aschia san ins sentir ch’il reginavel da Diu ei damaneivel. Cun quei giavisch salidel jeu

---

<sup>17</sup> *Instrumentum laboris* 131.

<sup>18</sup> Francestg, scriver apostolic *Evangelii gaudium* 2013, 259.

Vus tuts da cor e laschel vegnir tier a Vus mia benedicziun  
episcopala.

+ Vitus, uestg da Cuera